

SAN PABLO KARTA E'SU FXI'JNI KORINTO ÇXHABTEWE'SX JÏI

Dxus yakh fxi'zesatx Pablo fxi'jni

¹ Jesukristo jxkaahnisa Pablo yaaseth, txã'wê yûuwa'ja's Dxusku jxthâas txãa pa'ga. Naa karta's yakthê'j Timoteo yakh fxi'jçxa ka-jaçthu Dxus luuçx Korinto çxhabte pkhaakhena ùssawe'stxi. Sa' txãawe'stxiçxáa mée, Akaya kiwesuwe'sx Dxus luuçx jxukaysawe'sx jïi yã'jçxa fxi'jaçthu weçxana.

² I'kwe'stxi' Dxus kwe'sx tata' pu'çxhina vxite' kwe'stxi' jxpe'jsa Jesukristowa, txãa pa'ga Dxus yakhçxáa mfxi'zewe.

Pablo pxthaa nxuste fxi'zeni

³ Æçxha' Dxusa's wala weçxawa'j ji'ptha'w, txã' kwe'stxi' jxpe'jsa Jesukristo Tata', txãasak kwe'stxi's peeygãhçxa bagaçxtewa kvxiisxa'jna nes yu'.

⁴ Kwe'stxi' kïjkïh nxuswa'j en pa'thewa, kvxiisxa'ja'k Dxusa', aç'a' txãa ma'wêga kwe'stxi's kvxiisxa'j, txã'wêy kwe'sxwa vxitesa nxusna fxi'zesatx kvxiisxa'khanku txã'wê yû'.

⁵ Kristo's nwêese'pha'ga ma'wêga seena' nxuswa'j en pa'ja', nawa Kristo pu'çxte', txã'wêyçxáatha'w kvxiisxa'jnisa'swa jxpa'ga'.

⁶ Txã'wê i'kwe'sx ewte neeyûuwa'ja's jxpa'gaçxa kvxiisxa'jni yuukahnthaw kwe'sxa'

nxuste fxi'ze'. Dxusa' kwe'sxtxi kvxiisxa'jçxa', i'kwe'sxtxiwa txã'wěy kvxiisxa'jçxa ewte nvxiituna, kxah i'kwe'sxa' wantãyya' ājane'kwe kwe'sxtxi nxuswa'j en pa'ja'k txã'wěysa i'kwe'sxtxiwa pa'thewa.

⁷ I'kwe'sxa' nxuswa'j ena'sa' jxpa'gaçxa', Dxus kvxiisxa'jni'swa txã'wěyçxáa jxpa'gawa'jsa i'kwe txã'wě yūuwa'ja's ew jiitha'w.

⁸ Asia kiwete ma'wětka seena' nxussa's ji'phu txã'sna miijajkxwe, yakthē'jwe'sx. Kxteea' iimejk seena' wala nxuswa'j en pa'j, aç'a' peena yu' itxī fxi'zewa'j ji'phmeene'tka sūju'th wantãyya' çhãçxhameeçxa.

⁹ Açxha' uu en yuhna sūju'çxáath. Nawa naa kiwete itxī fxi'zeni's yajkxmée Dxus itxī vxit-sana yaakxkahnçxáak txã'wě yuu.

¹⁰ Txakwe seena' uuwa'theçxáa yã'j fxi'zeçtewa, Dxusa' adxa's nwe'wek, sa' açxwa nwe'wena nes txã'wě'.

¹¹ Kwe'sx pa'gate i'kwe'sxa' Dxus yakh puutx we'wepa'ga txã'wě nwe'wena nes yuuna sūhna Dxusçxáanath yaaki'. Sa' nasa maazkuēesawa kwe'sx pa'gate Dxus yakh puutx we'wete', Dxusa' kwe'sxtxi nwe'wena aç'a' txãawe'sxa' Dxusa's weçxaatxna.

Pablo' kīh yuuçxaga Korinton u'jmée

¹² Isath we'we', Dxusa's açesawe'sx yakhwa ew yuuçxáath yūuna fxi'ze, sa' i'kwe'sx yakh yu' wejxthu txã'wě ewçxáa fxi'ze sūhna yuuçxáak ūusuthe', txãa pa'gath weçxá'. Txa'wě ew yūuna fxi'zewa'ja's Dxusku pu'çx, aç'a' peekx ūusuhçxáa çhãçxha yajkçxaxa txã'wě ew fxi'zemeeth.

13 Adxa' i'kwe'sxtxi karta fxi'jçxa', ãsxiiya' sũhçxa fxiy yajkxna fxi'jmeeth, aç'a' i'kwe'sxa' kuh jwed yaakxnuwe.

14 I'kwe'sx maaí yu' adx kaapiya'jni' isasatewa jiyui'kwe na' ew jiyuna mjaxã'jwe. Txã'wẽ ew jiyuçxa', kwe'sxtxi jxpe'jsa Jesus kĩhte', i'kwe'sxa' wẽtwẽt yaakine'kwe adx i'kwe'sxtxi ew yũupa'ga, aç'a' adxwa wẽtwẽt yaaki'nja i'kwe'sx ew fxi'zepa'ga.

15 Txã'wẽ adx kaapiya'jni's ew jiisai'kwe txãa pa'ga adxa' e'z us pa'jya' yuwe'nja sũhna yaakxnith ji'phu' i'kwe'sx yakh weçxana puutx uyya'.

16 Nyafxte' Macedonia kiwen u'jweççxa iipa'j u'jwe'nja. Sa' Macedoniajũ ki' sxawedna yuhçxa ki' pa'ja'nja sũju'th. Aç'a' kxtee üsçxa Judea kiwen u'jweçte', i'kwe'sxa' adxa's pu'çxhine'kwe sũhna yaakxnith ji'phu'.

17 Ew ũus yajkxmey fxi'ja'ne' kxtey yu'nja jĩçxawa kxtey yu'çme', Dxusa's jiimeesa na'wẽ, sũjuwá'kwe.

18 Nawa Dxusa' jiia' adxa' e'z jwed we'we'çmeeth i'kwe'sxtxi's.

19 Txã'wẽ yũukahmení Dxus Nçxi'k Jesukristo' bagaçxte yuhwa e'z jwed we'wemée isasaçxá'sku we'we', aç'a' kwe'sxa' txajx we'weni'stha'w pta'sxi' i'kwe'sx ksxavxyte Silwano, Timoteo vxite' adx yã'jçxa.

20 Na'wẽ Dxusa' kĩh yũuwa'ja'swa puutx we'wek txã'sa' Kristo yuuçxáak jxuka kxtey yuu, Dxus puutx we'weni's kaavxya'ja'jna. Txãa pa'gatha'w Dxusa' bagaçxtewa kxtey yuusa' jĩna tuuthe'je'.

21 Txãasak Dxusa' adxna vxite' i'kwe'sxtxiwa pu'çx isasaçxá's kxtey yuuna fxi'zekahn, Kristo yuuçxá's selpiina fxi'zepa'ga.

22 Sa' Dxusa' kwe'sxtxi txhitxhçxa txajx Espiritu's peesku, Dxus jii yu'sa' kîhnawa jxuka txã'wêçxaçxáa jxpa'gawa'jsa i'kwe jîna kaa-jiyu'jna.

23 Na'wê Korinton u'jwe'nja sũhçxawa, kxtey yuunimeeth. Nawa txãa yu' wejxwa i'kwe'sxtxi juuna' we'wena ũsya'meeth txã'wê yũu. Adx ũuste ïsxiiçxa txã'jĩ'çmeeth txã'sa' Dxusa' jiiia'.

24 I'kwe'sxtxi ũusaçxaçxa txã'wê yuhmêe yuumeeth, wejxwa kimwa juuna' we'wemeete i'kwe'sx pwe'sxçxáa ewkuêeçxah yuwe's pheu'khanthu ũythasna txã'wê yũu. Adx txã'wê juuna' yũukahmenii i'kwe'sxa' Dxus yakh yu' çxhãçxha yã'j ũsi'kwe.

2

1 Aça' txã'wê juuna' we'weya'çxáa yu' u'jmeete ewna sũhnath yajkx.

2 Adxa's i'kwe'sx yuuçxáa wêtwêt kaayaki'jwa'jsa i'kwe naapkaçx txã'wê adxa' i'kwe'sxtxi juuna' we'weçxa kxũusu'the', adxa's çkim wêtwêt kaayaki'jikx? sũhnath yajkx.

3 Txãasath i'kwe'sxtxi kxũusu'jna pa'jya'mêe kartaçxáa fxi'jçxa kaah, i'kwe'sx txã'wê âhmêe yũuna ũspa'ga adxa' weçxana pa'japkaçxte, nxuswa'jçxáa ji'phu'nja sũhnath yajkx. Naasáa adx weçxana pa'the yuuçxáa i'kwe'sxwa txã'wêy weçxana ũswa'ja's ji'phune'kwe sũju'th.

4 Iiméh wala kuh yajkxna nxusçxa ũ'nenath karta's fxi'j, nawa i'kwe'sxtxi juuna' yuuçxa

kxūusu'jya' sūhna ūusaçxaçxa txã'wē
 yūumeeth. Adxa' i'kwe'sx txã'wē āhmée
 yūupa'ga iiméh wala peeygāhçxaçxáath txã'wē
 ū'nena fxi'j.

*Kazx pkal yūusa's peltunāyçxa kvxiisxa'khan
 yu'kxpehni*

5 Nawa txã'wē āhmée yūusa' adxçxáana
 txã'wē kxūusu'jme', i'kwe'sxtxiwa jxukaysatxku
 txã'wē kxūusu'j, txã'wē kazx yūuçxa. (Txã'wē
 kazxku yūu jīnaçxáath we'we' jxuka yu'
 pta'sxya'mée.)

6 I'kwe'sx puutx we'weçxa kastigāywa'ja's
 vxiti'kwe txã' kxtee pa'jçxáa ewna, jwee yu'
 thaakwe yuumée.

7 Wejxwa açxha' peltunāyçxa mekvxiisxa'jwe,
 txã'wēme' wejx thaakwe wala nxuçxa isa
 jxukate vxituwe'sxte.

8 Txāa pa'gath i'kwe'sxtxi neewe'we'
 peeygāawa'ja's ki' ji'phukahñ txã'wē āhmée
 yūusa's.

9 Juuna' yuukahñ i'kwe'sxtxi fxi'th, nawa
 adx jxkaahni's aan kxtey nwēese'jetxna
 sūhçxaçxáath jiyuya' txã'wē yūu.

10 Açxha' i'kwe'sxa' txã'wē āhmée yūusa's kīh
 yūuni'swa mpeltunaīwe, adxwa peltunāythu
 peltunāywa'j ūsu'k txã'sa' Kristo dxi'pte,
 i'kwe'sx pwe'sx puiimée ew fxi'zekahñ.

11 Txã'wēme', eçxthē'ja' wala yuh jīia'
 kwe'sxtxi kaypuba'jçxa knaywa'ja's txã'sa'
 jīitha'w.

Troaste Tito's uymeeçxa, Pablo wala nxus yaakxni

¹² Kristo nwe'weni's pta'sxya' Troas çxhabte pa'the', Kristo's selpiina ũswa'j en wala yuh ewsa vxyaak.

¹³ Nawa kwe'sx yakhtê'j Tito's uymeeçxa wala kuh yajkxthu, txãasath txajũ kasehçxa Macedonian u'j.

Kristo yakha' kîhtewa jxukak ewçxáa ya'fxi'ze'

¹⁴ Nawa Dxusa' pu'çxhi'k Kristo Jesus yakh fxi'zete', kîhtewa ewçxáa kaafxi'ze'jna, aça' tx-ajx yuwe's mteewa kaajiyu'jwa'jsatha'w, maa maawa jiyuna jxã'khan.

¹⁵ Txãa pa'gatey kwe'sxa' Dxusa's jiiyã'jsa' vxite ewte neeyũuwa'jsa ma'tx yuu meeçxa' vxituwa'jsa ma'tx yuu nawa kaajiyu'jwa'jsatha'w Dxus yakh fxi'zeni's.

¹⁶ Txã'wē yā'the', ¿kim txã'wē Dxus yuwe's kaajiyu'jya' u'jwa'jsa ũstxki? Vxituwa'jsa yakh yu', Dxus yakh fxi'zeni' wala yuh ewmée the-guna, naapkaçxha' ewte neeyũuwa'jsa yakha' iiméh seena' zhiçxkwesa yuuna.

¹⁷ Maafia' Dxus yuwe's yu'pthehçxa fxiytxi pta'sxna pekũju'. Nawa kwe'sxa' txã'wē yũ'çmeetha'w, sa' Dxus yuwe's vxyuu pa'gawa pta'sxna ũsmeetha'w. Txã'wē yũuya'méeíi, kwe'sxa' Dxus kaahnisatha'w, Kristo's selpisáa. Txãasatha'w ĩsxiimée ũusuh jxuka isasaçxá's we'we' Dxus dxi'pte.

3

Nwe'wewa'ja's u'se pheu'jçxa Dxus nvxiitnisa

1 Txã'wẽ we'wena fxi'jçxa', peekiçxáa ewsath jĩnak we'we' ¿sũjuwá'kwe? Meeçxa' vxitewa na'wẽtx neewe'wenisa karta jxũçxa pa'ja' aça' txãawa txã'wẽy jxũçxa pa'jwa'j ji'pha' ¿sũjuwá'kwe? Meeçxawa i'kwe'sx neewe'wenisa karta kutxi'jwa'j ji'pha' ¿sũjuwá'kwe?

2 Adxa' txã'wẽ vxitesa neewe'wenisa karta jxũçxa pa'jwa'j ji'phmeeth, txãa pa'gatey adxna neewe'wewa'jsa' i'kwe'sxiçxáa i'kwe. Txãasa adx mjĩini's maatzwa kaajiyu'jwa'jsa' i'kwe'sxi'kwe, karta na'wẽsa.

3 Kwe'sxtxi neewe'wesa' Kristo', txãasak txajx kuseju yuu fxi'jçxa karta ũs, aça' txãa karta' i'kwe'sxi'kwe. Nawa txãa karta' tintaju fxi'jni yuume'. Dxus Espiritujuk fxi'jni yuu, sa' kwet taplatewa fxi'jni yuumée, nasaa ũustek fxi'jni neeyũu.

4 Kristo pu'çxpa'ga, Dxusa's selpiiya' ãjãth, txãasath ĩsxiimée isa we'we'.

5 Dxusa's selpiiya' ãjãnisa' peekxçxáa txã'wẽ ya'ãjã'çme'. Txã'sa' Dxus pu'çxtek txã'wẽ ya'ãjã'.

6 Dxusa' naa ensu nasatx nwe'weya' ãjãwa'ja's pheu'jçxa nvxihtku txã' leya's nwẽese'jwa'j yu'çme', naasáa Dxus Espiritu's yuuçxáa ũuste jxpa'gawa'kh yu', aça' txã'sna pta'sxya' ãjãwa'ja'sku Dxusa' adxa's pu'çx. Ley fxi'jçxa nvxiitnisa' uuwa'theçxáak vxit, naapkaçxha' Dxus Espiritu' Dxus yakh fxi'zewa'ja'sku vxit.

7-8 Moises ley kwet taplate fxi'jnisa's jxpa'ga enteçxáa yuhwa seena' yuh zhiçxkwe eena' kweethku. Txãa pa'ga Moises dxi'pwa txã'wẽyku

eena' kweethna neeyũu. Aça' Israelwe'sxa' Moises dxi'pte thegya' ãjãmeeta', Moises dxi'pa' seena' eena' kweethpa'ga. Nawa tuhdtuhdçxah ũçxhana u'kh. Txã'wẽ uuwa'theçxáa vxit-sa leya's jxpa'ga enteçxáa yuhwa txã'wẽ seena' zhiçxkwe eena' kweethçxa', Dxus Espiritu kaapiya'jni en yu' wejx thaakwe zhiçxkwesa'.

⁹ Txã'wẽ yuuwesa i'kwe jĩna pta'sxsa leya's jxpa'ga enteçxáa yuhwa seena' zhiçxkwe yuuk aça' kwe'sxtxi yuuwemée ewte nvxiitwa'jsa's pta'sxni en yu' wejxku thaakwe zhiçxkwesa yu'.

¹⁰ Ley jxpa'ga ente' txã'wẽ yuh seena' zhiçxkwesa yuuk. Nawa ãçxh naa ensu thaakwe zhiçxkwesa vxyaak txãa yakh kaaja'da'the yu', nyafxiiwe'sxa' seelpimeesak yuu.

¹¹ Txaçxmeeçxáa selpiwa'jsa pa'j enteçxáa yuhwa zhiçxkwe yuuçxa', bagaçxte yuhwa pçumée selpiwa'j en yu' wejx thaakwe zhiçxkwesa'.

¹² Txã'wẽ bagaçxte yuhwa pçumée selpiwa'ja's jiiçxath ãate pta'sxna we'we'.

¹³ Adxa' Moises na'wẽ yũuçmeeth. Moisesa' txaçxmeeçxáa eena' kweethnisa ũçxhaçte Israelwe'sx uywe'sxte dxi'pa's yaaphku.

¹⁴ Sa' Moisesa' kĩh yuukahn txã'wẽ yaaph-tewa Israelwe'sxa' jiyumeeta'. Sa' ãçxh pa'jwa aphni ũsna jiyukahmen, txãa pa'gatx txãa leya's lëeyçxawa jiyuçmée. Aça' txãa aphnisa's Kristo's pi'kxçxa yuuçxáa phaadeya' ya'ãjana.

¹⁵ ãçxpkaçx aphni ũsna, Moises fxi'jnitx lëeyçxawa jiyukahmen.

¹⁶ Aça' maawa Jesukristo tasxte utxaate

yuuçxáak txãa aphnisa' phaadeni yu' jiyukahh.

¹⁷ Kwe'sxtxi jxpe'jsa' Dxus Espiritu', açã' txãa yakh ùste yu', jiyuwa'ja's weh yuhwa ya'jypubameena.

¹⁸ Txãa pa'gatey kwe'sxa' dxi'pa's yaaphni ji'phmeetha'w, txãa pa'gak Dxus kweethni' kwe'sx dxi'pte speeju na'wẽ eena' kweethya' ãjã'. Açã' Dxus Espiritu pu'çxte', jxukaysa jwee iıçxáatha'w Kristo ma'wẽsate', txãa na'wẽy fxi'zena u'jya' ãja', kwe'sxtxi jxpe'jsa Dxus Espiritu' txã'wẽ yũuwa'ja'sku pu'çxhi' naa pa'ga.

4

¹ ãhmeekwetewa Dxusku neewe'weçxa nvx-iht txajx tasxte selpiwa'ja's, kxahtha'w çxhãçxha yajkxna fxi'ze'.

² Kwe'sxa' jxuka nvxihttha'w paaçte ewmée yũuna iıxiina fxi'zeni's. Txãasa ewmée ya-jkxçxa Dxus yuwe's yu'pthehna ùsmeetha'w. Isaçxáanatha'w we'we', açã' Dxus dxi'pte iıxiija'çmeene' sũhnaçxáa miiyajkxwe jxukaysa.

³ Nawa ewte nvxiitwa'jsa Dxus yuwe's pta'sxi'tha'w txã'sa' maái yu' açxamée wáa ew jiyutxna, nawa txãa yu' vxituwa'jsa yakhçxáa txã'wẽ yũuna.

⁴ Txã'wẽ yũukahní naa kiwete jxkaahna ùssa eçxthẽ'ja' txãawe'sx ùus yaakxni's jxuka aphku, Jesukristo Dxus na'wẽysa kaapiya'jni zhiçxkwesa's jiyukahmen.

⁵ Sa' kwe'sxtxi nwẽese'j jxthãasçxa pta'sxi'çmeetha'w, wejxwa kwe'sxtxi nwe'wesa Jesukristo yuuçxá's nwẽese'jwa'ja' jĩnaçxáatha'w pta'sxi', kwe'sxa' naasáa

i'kwe'sxtxi selpiisaçxáatha'w, Jesusa's
nwēese'jsa.

⁶ Dxusa' nyafxiitey kīh yuhwa meetey çxhi'dx walate eena'sa's kaakh kweethkahn txāa Dxusiçxáak kwe'sx ūustewa eena' kaakweethe'j, Jesukristo' Dxusiçxáatewa jiyukahn.

Dxusa' pu'çxhina sūhnaçxáa fxi'zeni

⁷ Dxusa' kwe'sxtxi's neewe'wek Kristo kaapiya'jni txakwe seena' zhiçxkwesa's. Nawa kwe'sxa' txā'wē seena' zhiçxkwesa's we'weya' yu' ājawa'jmeesatha'w, aça' txā'wē kwe'sx yu' ājameete içxáak Dxusçxaçxáa pu'çxhi'.

⁸ Txāasaíçxáak thēyte fxi'zewa'j iiméh wala pa'thewa, txajūwa kasejxa' ājawa'ja's pu'çxhi'. Aça' nxuswa'j en pa'thewa, Dxusa' pu'çxhina sūhwa'j yuuçxá'stha'w ji'phu'.

⁹ Naa kiwetewe'sx yu' ahçetewa, Dxus yu' açeni fxi'ze'çmeetha'w. Pkxuuni fxi'zeçxawa, jxukate yu' vxituni yu'çmeetha'w.

¹⁰ Jesuswa ma'wēga uu txāa na'wēy uusáa na'wē yuuwa'j ji'ptha'w, itxī yuusáa Kristo pu'çxni's jxpa'gaçxa txāa na'wē yuuçxáa fxi'zeya'.

¹¹ Nawa kwe'sxa' naa kiwete nee fxi'ze'ççxa', багаçxtewa ikh wēeniçxáatha'w fxi'ze', Jesus kaapiya'jni's pta'sxpa'ga. Txāa pa'gak itxī yuusáa Kristo pu'çxni' vxyaana nes yu'.

¹² Txāasatha'w kwe'sxa' ikh wēeniçxá's jxpa'gana fxi'ze', naapkaçxha' i'kwe'sxa' Dxus yakh fxi'zewa'ja's i'kwe jxpa'gana fxi'ze'.

¹³ Dxus libroute' na'jīnak we'we': Dxus pu'çxwa'ja's jiith yu', txāasath txā'wē we'we'

jĩ'k. Aça' kwe'sxwa txã'wěy Dxus pu'çxwa'ja's ew jiitha'w, txãasatha'w pta'sxi'.

14 Sa' Dxusa' kwe'sxtxi na'wě yũuwa'ja'swa jiitha'w: Jesus uutewa ki' ĩtxĩ vxitku, sa' kwe'sxtxiwa txã'wěy ki' ĩtxĩ vxituna. Txã'wě yũuça txajx ũsnite pe'jna u'jwena petx i'kwe'sx yã'jçxa Jesus yakh fxi'zepa'ga.

15 Kwe'sxa' pkxuuni nxustetha'w fxi'ze', nawa i'kwe'sx ewte fxi'zewa'ja's uykahntha'w txã'wě yu', kxah maazkuẽesawa Dxus peeygãani's jxpa'gaçxa', kxaazkuẽesay Dxusa's weçxana tu-uthe'jetxna.

16 Txãasatha'w kwe'sxa' bagaçxtewa ũukhmée Dxusçxá's çxhãçxha yaaki'. Makwe kwe'sx kakwete çxhãçxhasa yu' pçuuna u'jweçtewa, Dxus yakh weçxana fxi'zewa'j yu' jweeĩçxáak een isa çxhãçxha ya'fxi'ze'.

17 Txãa pa'gatey naa kiwete nxuste fxi'zenisa' dudtewe'sxçxáa, txaçxmey skhẽwwa'jsa'. Aça' txãa skhẽwniijũ' bagaçxte yuhwa skhẽwwa'jsamée iiméh ewsa'sku cielute ya'ji'phu'.

18 Naa kiwetewe'sxa's yaakxwa'j ji'phmeetha'w, cielutewe'sxçxá's yaakxwa'j ji'ptha'w. Txãa pa'gatey naa kiwetewe'sxa' txaçxmey skhẽwwa'jsata', nawa cielutewe'sxa' bagaçxte yuhwa skhẽwwa'jsa meeta'.

5

1 Txajĩçxáa kwe'sxa' ew jiitha'w naa kiwete ĩtxĩ fxi'zenisa kakwe pçuutewa, vxite kakwe bagaçxte yuhwa pçuwa'jsamée thaakwe ewsa

kwe'sx jii pheu'jni ji'pha' Dxusa' cielute. Txã' pçuwa'jsa naa kiwetewe'sx na'wêsame'.

² Txahtha'w naa kakwete nxusna nee itxĩ fxi'zeçça', dud cielute üswa'j kakwe's jxpa'gawaça' sühna yaaki'.

³ Txãjũ yuuçxa', kakwe ji'phmée yu' üsmée, kakwe ji'ph neeyũ'nja'w.

⁴ Naa kakwete nee itxĩ fxi'zeçça', nxus ya-jkxnatha'w fxi'ze'. Nawa naa kakwe iisxsa's ahççxa dud uuwaça' sühçxa txã'wē nxus yaaki'çmeetha'w, naasáa naa kakwe's dud phu'se'jni yuute', kwe'sx kakwe pçuwa'jsaçxawa kxtee u'se yuuna pa'jana sühçxatha'w txã'wē yüuwa'ja's dud jxthãasu'.

⁵ Txã'wē yüuwa'ja's Dxusku pheu'j, txãasak txã'wē yüuwa'ja's jxpa'gawa'jsa yuji'kwe jičxa nyafxte txajx Espiritu's khuē'y üs.

⁶ Pejka txã'wē yüuwa'jsa yuhtha'w, nawa naa kakwe yakh nee itxĩ üsüi yu', cielute kwe'sxtxi jxpe'jsa Jesukristo üsna kxtee açxhüi yu' üsya' äjä'çmeetha'w.

⁷ Nawa pejka kxtee pa'jwa'jsa yuhtha'w sühnaçxáatha'w fxi'ze'.

⁸ Txã'wē kwe'sxtxi jxpe'jsa tasxte pa'jwa'ja's jüitha'w, txãasatha'w naa kakwete itxĩ fxi'zeni's nvxihtçxa txãa yakh üsya' u'j wėje'.

⁹ Txãasa naa kakwe yakh nee üsüi mtha'w yuu, khĩmeeçxa' naa kakwe's ji'phmée yã'jmtha'w yuu, nawa Kristo dxi'pte ew fxi'zewa'ja's yuuçxáatha'w pa'pçxu'.

¹⁰ Txã'wē jxpa'yakxmeete', Kristo tasxte jxukaysa kuutxa'jnisa yu'nja'w. Naa kiwete ew mtha'w selpiisáa yuu, meeçxa' ewmée mtha'w

selpiisáa yuu nawa teeçxsa na'wëçxah peekx selpiini's jxpa'gawa'jsatha'w.

Dxus yakh yuuwemée neeyũuni's pta'sxni

¹¹ Txã'wë Kristo tasxte utxaaçxa ma'wë selpiisaçxawa txã'sa' paswa'j ji'ptha'w, txãasath Dxusna yuuçxáa selpi' i'kwe'sx dxi'pte. Adx ma'wë selpini'swa Dxusa' jiiyã'ja', aça' i'kwe'sxwa adx kîh yũusatewa jiyuwaça' ewna sũju'th.

¹² Adxa' thaakwe ew selpisaath jîna iiwejçx we'wena ũsmeeth, naasáa adx ew selpini's i'kwe'sx yaakxkahnçxáath txã'jî'. Txã'wë adx ew selpini's i'kwe'sxa' jii ũsçxa íçxáa, adxna ewmée nuywe'wesawe'sxtxi' pasya' ãjãne'kwe.

¹³ Adxa' luuku na'wë wá'ntka we'we', nawa txã' Dxus jî'. Aça' luuku na'wëmée we'weçxa yu', i'kwe'sxtxi ne'tka we'we' jiyukahn.

¹⁴ Kristo' jxukaysa pa'gate peeygãhçxa uuk, aça' txãa peeygãani's yajkxte', txã'sna selpiwa'j yuuçxáak kaseje', na'wë yajkxna:

¹⁵ Kristo' jxukaysa pa'gate uupa'ga, maawa txãa yakh ũssa' jxukaysa uusáa na'wësatha'w yuu sũhna. Aça' txãa yakh fxi'zesawe'sxa' ma'wëwa fxi'zemée, wejxwa na'wë txãawe'sx pa'gate uuçxa ki' ítxî yuuk txã'sçxáana selpiina fxi'zewa'jsata'.

¹⁶ Txãa pa'ga ãçxhũyã'ja' vxite ma'wësatewa txãatx thegna ũusteçxáa yuhwa yaakxwa'j ji'phmeetha'w. Adxa' nyafxíi yu' wala ne'tka jxpuba, txãasaíith Kristo's naa kiwete kwe'sx na'wëysaíçxá' sũhna yaakxni ji'phu'. Nawa ãçxha' txã'wë yaakxni's yu'pthehwa'ja',

17 txãa pa'gatey maawa Kristo tasxte utxasá' jxuka yu'pthehnik yu'. Nyafxíi yajxna fxi'zeni's nvxihtçxa, u'sesaçxaçxáak ya'jypa'ga'.

18 Txã'wê u'se yuuwa'ja's Dxusçxaçxáak vxitu', txãasak txãa yakh ew fxi'zewa'ja'swa vxitu', kwe'sx pa'gate Kristo's uuwa'j vxitçxa. Dxusa' txã'wê yũuçxak adxa's neewe'weçxa nvxiht, txãa yakh ew fxi'zewa'ja's jxukaysatx pta'sxkahn.

19 Ew jiyute yu', Dxusa' naa kiwete nasaa pkaltxi jxuka peltunãyçxa txãa yakh ew fxi'zewa'ja's pheu'jya'k txã'wê Kristo's uuwa'j vxitna ũsu'. Dxus txã'wê yũuni's pta'sxkahnku adxa's neewe'weçxa nvxiht.

20 Txãa pa'ga adxa' Kristo nwe'weni's pta'sxya' Dxus kaahni yuhth. Txãasath Dxus yuu we'we'ç na'wê adxa' i'kwe'sxtxi jxkaaja' na'jĩna: Dxus tasxte mutxaawe, txãa yakh fxi'zeya'.

21 Kristo' kĩh pkal yuhwa ji'phu'çme', nawa kwe'sx ewmeesapa'gaçxáa txãak Dxus kastigo's jxpa'ga. Aça' kwe'sxa' Kristo's jxpa'gaçxa', ewmeesaçxawa Dxus dxi'pte yuuwemeesa yuukahnku txã'wê yũu.

6

1 Txãasa adxa' Dxusna selpisaath. Txãa pa'gath i'kwe'sxtxi yu'kxpeje': Dxus peeygãani's jiyuyã'jçxa', wa'lmée jxpa'gakahn.

2 Dxus peeygãawa'j ena's na'wêk pta'sxi' Dxus librute:

Ju'gu yuuwa'j en ähte', wêse'th,

Sa' pu'çxthu ewte neeyũukahn jĩ'k.

Txãa pa'ga açxha' txã'wê yũuwa'j en äjk, aça' naa ensu' ewte neeyũuwa'j ente ũstha'w.

³ Adx mjiini's ewmée nuywe'wekahmen, kim yuhtxwa ewmée yūuna ūsmeeth.

⁴ Makwe wala pxthaa yuuna, wantāyna, kīhtewa pejiina, thēyte fxi'zena ūsçxawa, Dxusna selpiinisaçxá'sthū kaavxya'ja'jna fxi'ze'.

⁵ Adxa's pāpaçxa karcelte txaahnisath yuu. Wēesxuna pkxuuni wala thēyte fxi'ze'th. Çxhāçxha mjīweete deewa'j en yuhwa uymée, wēenath fxi'ze'.

⁶ Nawa Dxus dxi'pte na'wē ew yūuniçxá'sthū kaavxya'ja'jna fxi'ze': açewe'weçtewa ka'tu yu' ew yūuna, Dxus Espiritu adx yakh fxi'zeni's kaajiyu'jna, ūsuh jxuka peeygāani's kaavxya'ja'jna,

⁷ isasaçxá's pta'sxna, Dxus puçxni's kaavxya'ja'jna. Sa' açewe'wesatx paswa'j ma'k yuu meeçxa' pkxuuçte paswa'j ma'k yuu nawa kīhtewa ewçxāa paswa'ja'sçxāath yajxna fxi'ze'.

⁸ Sa' ki'kinte' wedxnith fxi'ze', nawa maa enteya' açenith fxi'ze'. Vxite ensuy yu' ew we'wena ki' ewmée we'wenith fxi'ze'. Ki'kinteya' īsxiisa' jīna nuywe'weni, nawa maa enteya' isasa's pta'sxsa' jīna we'wenith fxi'ze'.

⁹ Maa enteya' nasa jiyunimeesa thastxi adxa's we'we', nawa maa entey yu', adxa's wala namiku na'wētx ew we'we'. Maa enteya' uuwa'theçxāa yā'th fxi'ze', nawa u'ç yu' meeth. Wala pkxuuni yuuçxawa, ikhni yu' yu'çmeeth.

¹⁰ Makwe wala kxūusu'jni ūsçxawa, weçxanath fxi'ze'. Naa kiwete kīhwa ji'phmeesaçxawa, maazkuēesatxwa ji'phsath vxitu' Dxus dxi'pte. Makwe ji'phmeesaçxawa, kīh yuhwa peejii yu' meeth fxi'ze'.

11 Korintote yakhthē'jwe'sxtxi īsxiiçxa txã'jĩ'çmeeth, adx ũuste ũusutheni's jxuka āateth we'we'.

12 I'kwe'sx yu' adxa's açeyaaki'ne'kwe, nawa adxa' ka'tu yu' i'kwe'sxtxi' açeyaaki'çmeeth.

13 Neyā' luuçxtxi's ma'wēga peeygāhna we'we', adxwa i'kwe'sxtxi' txã'wēythu peeygāhna we'we'. I'kwe'sx ũus yaakxni's paaçteçxāa ji'phumée āate we'wekahnthu adx ũus yaakxni's āate we'we'.

Dxus ĩtxisa ũswa'jçxáatha'w

14 Dxusa's jiimeesawe'sx yakha' ptamuwa'jme'. Txã'wēme' kxteeçxah txāawe'sx na'wēy yūuna fxi'zeya' ājameene'kwe. Ewsa' ewmeesa yakh fxi'zewa'jsame'. Eena'sa' çxhi'dxsa yakh kxteeçxah ũsya' ewu'çmeeta'.

15 Kristo' eçxthē'j yakha' puutx utxa'çmeeta'. Dxusa's jiisa' Dxusa's jiimeesa fxi'zenite fxi'zewa'jme'.

16 Dxus ũsnite' Dxus ĩtxīmeesa' ũswa'j ji'phmeeta'. I'kwe'sxa' Dxus ĩtxīsa ũswa'jçxāa i'kwe. Txajīk Dxusa' na'jīna we'we:

Adxa' txāawe'sx Dxus yu'nja,

Txāawe'sx ũuste fxi'zewa'jsa.

Aça' txāawe'sxa' adx luuçx yuutxna jĩ'k.

17 Sa' vxite ajkhēwa na'jīnak we'we:

Ewmeesawe'sx ksxavxyu kasehçxa utxaanuwe,

Sa' ewmeesa's jxa'dxnuwe.

18 Txã'wē yūute', i'kwe'sxtxi adx jxpa'gaçxa

Ney na'wē yu'nja.

Aça' i'kwe'sxa' adx luuçx yuune'kwe jĩ'k kīhtewa jxuka ājāsa Dxusa'.

7

1 Dxusa' txã'wẽ ew fxi'zewa'ja'sku jxkaaja'. Txãa pa'ga, yakhthẽ'jwe'sx, wala jxpa'yakx fxi'zewa'j ji'ptha'w, kwe'sx kakwe ma'k yuu meeçxa' kwe'sx ũus ma'k yuu nawa suwwa'jsa yu'sa' ka'ga'jwa'j ji'phmeetha'w. Dxusçxáana yajkxna jxpa'yakx fxi'zewa'j ji'ptha'w.

Korintotewe'sx ewmée yũunijũ sxawedni

2 Adxa's açeyaakxnuwe. Adxa' kim yuhtxwa ãsxiina kaypuba'jna ewmée yũuna ũsmeeth.

3 Aça' i'kwe'sxçxáa yuuwesa i'kwe jĩçxa txã'jĩçmeeth. Txã'wẽ yajkxmeeçxaiith adx peeygãanisa i'kwe, txãasa adx yakh ja'daçxah fxi'zena txutemey uuwa'jsatha'w jĩnath we'we.

4 Makwe seena' nxuswa'j ente ũsçxawa, i'kwe'sxtxi yajkçxa weçxanaçxáath fxi'ze', weh yuhwa ewmée yu' yajkxmée.

5 Macedonia kiwete pa'jii le'çxkuẽçxáa yuhwa jxkaasewa'j ji'phumeeth. Kĩhwa jxukak thẽysaçxaçxáa vxyaa, adx pekũhnisu yu' mteewa jxuka. Açesawe'sx yakh pdxi'puwa'jwa ji'phuth, sa' ũustewa ũukh yaakxwa'j kasejk.

6 Nawa Tito pa'pha'ga Dxusa' adxa's kvxi- isxa'kh, nxusna ũstewa.

7 Nawa Tito yakh puutx uypa'gaçxáa adxa's txã'wẽ weçxa en pa'jme'. Tito' adx tasxte seena' wala weçxana pa'kh, i'kwe'sx ew yũuya' yaakxpa'ga. Sa' pta'sxku txakwe wala ãhmée yũuçxawa idx yakh weçxaya' puutx uy wẽje'tx jĩnisak wejx wala kvxiisxa'j.

8 ¿Kĩjxa'ki'th i'kwe'sxtxi juuna' we'wena txã'wẽ karta fxi'j? sũhna wala kuh yajkxthu txãa

ensu yu'. Nawa ãçxha' txã'wẽ yaaki'çmeeth. Nyafxii yu' txã'wẽ yaakxkahnii txãa karta' i'kwe'sxtxi wala kxũusu'kh maz en yu'. Txagaçxhiiçxáa juuna' we'weni's kuh yajkxçxa', ãçxha' adxa' weçxa'th.

⁹ Nawa i'kwe'sxtxi kxũusu'jçxa weeçx yajkxna txã'wẽ weçxaçmeeth, wejxwa txãa juuna' we'wenisa' i'kwe'sxtxi wala selpiik, ewmée yũuniijũ kaasxwedu'jna, txãa pa'gaçxáath weçxá'. Aça' i'kwe'sxa' txãa nxus en pa'pha'ga ũusçxa yajkxmée Dxus dxi'pte ew fxi'zewa'jçxá's i'kwe kxtey yuu. Txãa pa'gath adxa' kimnawa açesameeth sũju'.

¹⁰ Txãa pa'gatey ãhmée ne'tka'w yuu sũhna wa'lmée Dxus yakh ew fxi'zewa'ja's pakwete', ewmée yũuni's nvxihtçxa ewte neeyũuwa'ja'sku ya'jypa'ga'. Txãa pa'ga nxuswa'j entxi' açewa'jme'. Nawa ãhmée ne'tka'w yuu sũhwa'ja's yajkxmeete', vxituwa'jçxáak kaseje'.

¹¹ I'kwe'sxa' Dxusçxáana yajkxna ne'kwe txãa nxusnisa's ahçemée jxpa'ga. Aça' txã'wẽ yũupa'ga ma'wẽga ew fxi'zewa'j kaseh txã'sa' miiyajkxwe naata': Æhmée ne'tka'w yuu sũhna ũukhçxa yuwe's pheu'jya' yajkx i'kwe, txãa ewmée yũusa's kastigãywa'ja's puutx we'wena. Txã'wẽ yũuçxa', adx yakh puutx uyya' yajkx i'kwe. Txãasa i'kwe yuuwemeesa yuu.

¹² Adxa' txãa karta's fxi'jçxa', txãa ewmée yũusa's açeyajkxna txã'wẽ yũumeeth, sa' ewmée yũute nxussa'swa yajkxna txã'wẽ fxi'jmeeth, naasáa i'kwe'sxtxi' wala yuh yaaki'th Dxus dxi'pte txã'sa' i'kwe'sx jiyukahnçxáath

txã'wẽ fxi'j.

¹³ Txãasath i'kwe'sx kxtey yuute' wala weçxawa'ja's jxpa'ga.

Nawa na'wẽ weçxawa'ja's ji'phuth txãajũ jweeíçxáath wala weçxawa'j ji'phu i'kwe'sxa' Tito's wala ewçxáa jxpa'gaçxa ewçxáa ne'kwe jxpe'jna ũsu' aça' weçxanak sxawed naa pa'ga.

¹⁴ Adxa' Tito's kajaççxa' i'kwe'sxtxi we'wena: Wala ewsata' jĩth txã' ĩsxiini kasehme'. I'kwe'sxa' adx yaakxni's kxtey i'kwe yuu, Tito's ew jxpa'gana. Txãasa adx we'weni' bagaçxtewa isasaçxaçxáata'.

¹⁵ I'kwe'sxa' ma'wẽne'kwe ewkuẽçxáa jxpa'gaçxa txajx we'weni's kxtey nwẽese'j txã'wẽ ew yũuni's yajkxçxak Tito' jweeíçxáa i'kwe'sxtxi's wala weçxá'.

¹⁶ I'kwe'sxtxi's kĩhte yuhwa ewmée yaakxwa'j ji'phmeeth, txãasath weçxá'.

8

Ji'phuni's wa'lmée weçxana peesni

¹ Āçxha' yakhthẽ'jwe'sxtxi pta'sxi'th Dxus luuçx Macedonia kiwesuwe'sxa' pu'çxwa'ja's áate kaavxya'ja'jtx Dxus kaayaki'the.

² Txãawe'sxtxi' txakwe wala thẽyte fxi'zewa'j pa'jçxawa, Dxus yakh jweeíçxáa çxhãçxha fxi'zekahnku txã'wẽ yũu, txãa pa'ga wala weçxana fxi'ze'tx. Txãasatx wala ji'phmeesaçxawa ũçxhi'dxmée pees.

³ Txãawe'sx ji'phuni yu'sa' wa'lméetx pees, sa' ma'wẽçxáawa yũuna pakweçxatx txã'wẽ yũu. Txã'wẽ yũuni's adxa' ew jiith.

4 Txãawe'sx we'weçxa': Kwe'sxa' yakhthê'jwe'sxtxi pu'çxya' vxyuu pkhakh wêje'tha'w aça' idxa' ¿ma'jĩki'g? jĩnatx we'we.

5 Aça' adxa' kxtee pa'j yu' yuumeetxna sũju'ne'thka. Nawa nyafxte' txãawe'sx kakwe yuunatx Dxus kusete dukh Dxus jxthãasniçxá's kxtey yuuya'. Txã'wê yũuçxatx kwe'sx ma'wê jxkaathewa kxtey yuuya' yajkx. Txã'wê yũuni'sthu pta'sxi'.

6 Aça' Tito nyafxii i'kwe'sx yakh ũsçxa', vxyuu pkhakhya' takhku txã'sa' pkhakhna kãaja'khan Tito's neewe'weçthu ki' yuja' naa pa'ga.

7 I'kwe'sxa' kĩhtewa jxuka ãjãsa i'kwe Dxusçxáana yajkxna, wa'lmée kaapiya'jna, wala jiisa i'kwe, dud pa'pçxuwa'ja'swa nwêese'jna adxnawa ahçemée peeygãasa i'kwe. Txãasa pu'çxwa'j vxyuu pkhakhwa'ja'swa txã'wêy myũuwe.

8 Juuna' jxkaahna txã'jĩ'çmeeth, naasáa vxitesa pa'pçxuni's jiyuçxa', i'kwe'sxwa isa peeygãja'ççxa', txã'wêy pu'çxhiwá'kwe sũhçxaçxáath txã'jĩ'.

9 I'kwe'sxa' peekx jii i'kwe kwe'sxtxi jxpe'jsa Jesukristo peeygãani's. Txã' ji'phsak yu', nawa kwe'sxtxi wala peeygãhçxa ji'phmeesak yuu, tx-ajx ji'phuni's kwe'sxtxi ũsya'.

10 I'kwe'sxa' jũ'na anxutey pu'çxya' takhi'kwe, nawa jxkaatheçxáa txã'wê yũumée, peekx yuu i'kwe txã'wê pu'çxya' yajkx, aça' txã'wê yũunisa' ewsa yuja' jĩnath yu'kxpeje' adxa'.

11 Nyafxiiwa ma'wêkwe weçxana peesna ũsu' i'kwe'sx ji'phuni yu'sa', ãçxwa txã'wêyçxáa myũuwe kãaja'phkaçx.

12 Txãa pa'gatey ma'wẽkuẽçxáa ji'phçxawa, wa'lmée weçxana peesni's Dxusa' jxpa'ga'k. Dxusa' jiia', ji'phmeetewa.

13 Txã'wẽ i'kwe'sxa' vxitesatx pu'çxte', txãawe'sxçxáa peejimée fxi'zete', i'kwe'sx yu' ji'phmée thēyte fxi'zekahn txã'jĩ'çmeeth.

14 Puutx ya'pu'çxna ja'daçxah peejimée fxi'zekahnthu txã'jĩ'. ãçxh naa ensuy yu' i'kwe'sxa' kĩhwa ji'phi'kwe vxite peejiina fxi'zesatx pu'çxwa'j. Nawa vxite ensu' i'kwe'sx ji'phmée peejiina fxi'zeçpkaçxha', txãawe'sx i'kwe'sx peejini's pu'çxhitxna. Txã'wẽ yũuna puutx peejimée ya'fxi'zena.

15 Txã'wẽ puutx pu'çxwa'ja's pta'sxçxak Dxus librute na'jĩ': Wala pkhaktewa kijxaame', sa' le'çxkuẽe pkhaxsanawa peejime' jĩ'k.

Tito yakh vxite kaapi'ki'jçxa kaahni

16 Dxusa' Tito's kaayaki'jne' adx na'wēy i'kwe'sxtxi's peeYGāawa'ja's.

17 Txãa pa'ga ãçxha' i'kwe'sxtxi's thegya' yuja' kimwa jxkaahmeete, txajx ũuste peeYGāawa'ja's yajkçxça, sa' adx neewe'weni's kxtey yuuya' yuja'.

18 Tito's pi'kxna teeçx yakthē'j kajaçthu. Txã'sa' Dxus luuçx msuuwe'sxwa wala neewe'we'tx Dxus yuwe's wala pta'sx pu'çxsa' jĩna.

19 Sa' txã'wẽçxáa neewe'wemée, txãa yakthē'ja's txhitxhtxi. Na'wē Dxus dxi'pte kselpi'ji'jwa'j vxyuu pkhakhna ũstha'w txã'sna adx dukhya' Jerusalenna u'jweçte pi'kxna u'jwa'jsa jĩçxatx txhitxh.

20 Adxa's ewmée nuywe'wewe'sxte, txãa yakhthê'ja' adx yakh ja'da yuuwa'jsa', na'wê peeswa'j pkhakhna ũsta' txã'sna jxūna u'jweçte.

21 Kĩhtewa jxuka ewçxáa yūuya' ũsthu, Dxus dxi'pteçxáamée, nasaa dxi'ptewa txã'wēy.

22 Titowe'sx txãa e'zsaçxáamée, vxite yakhthê'ja'swa kajaçthu, txã' ew yūuwa'j yu'sa' kĩhtewa jxukak pa'pçxuna fxi'ze', sa' açxha' i'kwe'sx yuutxi'sa' wejxku wala thaakwe weçxana yaaki'.

23 Tito kxtee pa'the', i'kwe'sxtxi pēyiwáatxna ¿Tito' kimna? jīna, aça' Pablo yakh mjī pu'çxsa' ayte kwe'sxtxi selpisáa jīne'kwe. Meeçxawa vxite yakhthê'jwe'sxtxi wáa ¿kimtxna? jīna pēyitxna aça' Dxus luuçx neewe'weçxa kaahnisata', Kristo's selpisáa jīne'kwe.

24 Açxha' i'kwe'sx peeygāani's āate mkaavxya'ja'jwe txãa yakhthê'jwe'sxtxi ew jxpa'gana, kxah Dxus luuçx vxite ahsu pkhaakhesawe'sxwa i'kwe'sx peeygāani's jiyutxna, aça' i'kwe'sxtxi adx we'weçxa': Ewsata' jī'th txāawa kxtey kasejena.

9

Yakhthê'jwe'sxtxi pu'çxwa'j vxyu pkhakhni

1 Dxus yakh fxi'zesa yakhthê'jwe'sxtxi pu'çxya' vxyuu pkhakhwa'ja's i'kwe'sxtxi kaayaki'jna fxi'jwa'j peejxmeena sūju'th,

2 txãa pa'gatey i'kwe'sxa' kĩhtewa wa'lsameetewa jiith. Txãasath Macedonia kiwesuwe'sxtxi'sa' weçxana na'jīna pta'sx: Akayasuwe'sxa' jū'na anxutey pu'çxya' ih

ũsta' jĩth. Aça' Macedonia kiwesuwe'sx maazkuẽesawa i'kwe'sx pu'çxya' yaakxni's jiyuçxa', txãawe'sxwa pu'çxya' yajkxtxi.

³ Txã'wẽtewa naa yakthẽ'jwe'sxtxi' neewe'weçthu, kxah adx we'weçxa': Korintotewe'sxa' pu'çxya' ih ũsta' jĩth txã' ĩsxiini yuumeena. I'kwe'sxa' kxtey yuukahnthu txã'jĩ'.

⁴ Txã'wẽme', Macedoniajũwe'sx maafia' adx yakh ja'datey yuusa' i'kwe'sx kxtey yuumée ũsiyna kpaakitxna, aça' wala thaame yuhna i'kwe'sx txakwe wala pu'çxya' ũsta' jĩnisa txã'wẽ kxtey yuumeete'.

⁵ Txãa sũhçxath naa yakthẽ'jwe'sxtxi yaçte kaajxa' yajkx i'kwe'sx tasxna, aça' txãawe'sx pa'jçxa' na'wẽ pu'çxwa'j pkhakhya' yajkx i'kwe txã'sa' pkhakh pu'çxna jxã'khan. Kxah i'kwe'sx wala pkhakhya' neeyũui'kwe txã'sa' ũçxhi'dxmée kãaja'jane'kwe, makwe peesweçxtewa.

⁶ I'kwe'sxa' peekx jii i'kwe: walamée mjĩite', ũ'wa wala meek kaseje'. Nawa wala mjĩite', ũ'wa txã'wẽy walak kaseje'.

⁷ Teeçxsa na'wẽçxah i'kwe'sx ũuste makwe peesweçxte', txã'sçxáa kxtey yuuwa'ja'. Wa'lna txã'wẽ yũuwa'jme', txãa pa'gatey Dxusa' peeygãja'k ũuste weçxana txã'wẽ peessa's.

⁸ Txã'wẽ yũute', Dxusa' peejimée ũsna nes yuuna i'kwe'sx peejini yu'sa' jxuka. Txajĩçxáa i'kwe'sxa' vxitesatxwa ũçxhi'dxmée wala pu'çxya' ajãne'kwe.

⁹ Txã'sna we'weçxak Dxus librute na'jĩ': Ji'phmeesatx wa'lmée weçxana pu'çxsa's txã'wẽ ew yũupa'ga,

Dxusa' peejxmée ũsna nes yuuna jĩ'k.

¹⁰ Uuhwa'j fxiwa's Dxusku ũsu', sa' txãa'ĩçxáak kbuuçxa'jna nuywalá'. Txãa pa'ga i'kwe'sxa' ũ'wa'ja's peejxmée jxuka uyçxa', vxitesatx peeswa'ja'swa wala uyuune'kwe.

¹¹ Txã'wē yũute', i'kwe'sxa' kīj'kĩhwa ji'phsa yuuçxa wa'lmée pu'çxya' ājane'kwe. Aça' i'kwe'sx ũçxi'dxmée peesya' pkhakhni's kwe'sx jxũna u'the', jxpaga'sa yakthē'jwe'sxa' Dxusa's weçxaatxna.

¹² Na'wē yakthē'jwe'sxtxi pu'çxwa'j kajaçtha'w txã' txãawe'sx peejiniçxá's selpiwa'jsame'. Txã'wē yũupa'ga txãawe'sxa' Dxusa's wala weçxakahn txã'wē pu'çxhiçtha'w.

¹³ Na'wē pu'çxnisa's txãawe'sxa' jxpagaçxa', Kristo jkkaahni's nwēese'jsa yuh yu'ta sũhna jiyutxna, txãasa Dxusa's tuuthe'jna wala weçxaatxna, txã'wē i'kwe'sx wa'lmée peesya' pkhakhçxa txãawe'sxtxi peesna vxitesatxwa peespa'ga.

¹⁴ Dxus pu'çxte i'kwe'sxa' txã'wē ew yũupa'ga, txãawe'sxa' iiméh wala weçxana Dxus yakh puutx we'wetxna i'kwe'sx pa'gate.

¹⁵ Dxusa's iiméh wala weçxa'tha'w txajx Nçxi'ka's yuu kwe'sxtxi peespa'ga.

10

Pablo juuna' jkkaahwa'ja's Kristo ũsni

¹ Adxa' Kristo na'wēy wala peeygãhna i'kwe'sxtxi we'we'th, adxa's açewe'wena na'jĩ'i'kwe txã'sna: Pablo' kwe'sx yakh ih ũçxa

yu' ma'jĩme'. Nawa jxu'j txuteeyã'jçxa', wala juuna' we'wena jxkaaja'k jĩna i'kwe nuywe'we'.

² Adx i'kwe'sx tasxte pa'jçxa maaĩtxi's juuna' yuukahmen, adxa's nuywe'wenuwe, txã'wẽ Dxus jxthãasnime'sku juuna' jxkaaja' jĩna. Txã'wẽ nuywe'wesa yakh yu' puutx pdxi'puya'çxáa ũsthu maa yakhwa.

³ Adxa' i'kwe'sx na'wẽy nasaçxáa yuhth. Nawa adxa' naa kiwetewe'sx na'wẽ puiiya' ũsmeeth.

⁴ Kwe'sxa' naa kiwete puiinisa yakh pui'çmeetha'w. Dxus kaaũusuthe'jnisa yakhtha'w pui'. Txãasa ewmeesa yu'sa' makwe seena' walasatewa knaywa'jsatha'w.

⁵ Txãasatha'w knayu' Dxusa's jiyukahmen yupsa yu'sa' ma'wẽsatxwa, kwe'sx ũus yaakxni yu'sa' nwẽese'jmée, Kristo kaaũusuthe'jniçxá'stha'w kxtey yu' Kristo's nwẽese'khan.

⁶ Sa' i'kwe'sx yu' ew yã'j nwẽese'thewa, maaĩ yu' nwẽese'jmée ũssatxi's maatxwa kastigãyya'çxáa ũsthu.

⁷ I'kwe'sxa' ãakhẽwe'sxçxá's i'kwe thegu', txã'wẽ maawa Kristo's selpisath sũhna yaakxsa', adxnawa txã'wẽy Kristo's selpisana sũhna yaakxwa'jna.

⁸ Adxa' juuna' jxkaahwa'jsath jĩna we'wena nesthu yu', nawa txã'jĩpa'ga thaamewa'j yu' ji'phmeeth. Txãa pa'gatey Kristok txã'wẽ ivxi-itumée wejxwa juuna' jxkaahna yu'kxpehwa'ja's adxna ũs, i'kwe'sxa' Dxus yakh çxhãçxha fxi'zekahn.

⁹ Aça' ũukhkahnku karta juuna' fxi'jçxa kaja' sũhna yaakxnuwe.

10 Sa' i'kwe'sx we'weçxa': Kartate yu' wala juuna' we'wena fxi'ja'k, nawa puutx pdxi'puçxa yu', jxkaahwa'j yu'sa' aja'çme' j'i'kwe.

11 Nawa txã'jīsa' jxpa'yakina, ma'wētka jxu'ju ūsçxa, juuna' we'wena karta kaja' na', txã'sa' kxtey yu'nja i'kwe'sx yakh puutx uyna pa'jçxa'.

12 Wala mjīisatha'w jīna weeçx we'wesa yakh kaaja'da'jna ūs wēemeeth. Txāawe'sxa' iiméh wala jiimeeta', txāasatx vxitesate thaakwe mjīisatha'w jīna fxi'ze'.

13 Adxa' txāawe'sx na'wēy vxitee mjīinisū iweeçx we'wena fxi'zewa'j ji'phmeeth. Adxa's Dxus mtee pa'j mjīina pekūhwa'ja's ūsuna kxtee pa'j mjīiwa'jsath. Txã'wēçxa íçxáath adxa's Dxus kaathe', i'kwe'sx tasxtewa pa'j.

14 Txã'wē adx pekūhwa'jmeesu yu' u'jmée ūsthu na', i'kwe'sx tasxsuwa adx pekūhwa'jmeewaç yu', i'kwe'sx yakh ūsya' nyafxíi pa'jwa'jmée ne'tka yu'. Nawa i'kwe'sx tasxsu adx pa'jwa'kh yu', txāa pa'gath Kristo kaapiya'jni ewsa's i'kwe'sxtxi pta'sxya' adx nyafxte pa'j.

15 Txāasa adxa' vxitee mjīini's iweeçx we'wena ūsmeeth. Txã'wē we'wemée wejxwa Dxus pu'çxte', jweeíçxáa i'kwe'sx yakh wala mjīiya' aja'nja, i'kwe'sxa' jweeíçxáa Dxusa's jiyukahn sūju'th. Nawa Dxus mtee pa'j mjīikaathe', kxtee pa'jçxáa.

16 Txã'wē yūuçxa txāa e'su' vxitee ahsuwa kaseje'nja Dxus yuwe ewte nvxiitwa'jsa's pta'sxna. Nawa vxitee mjīinisū yu' iweeçx we'wena u'kame'nja sūju'th.

17 Adxthu mjïi jïna we'wepkaçxte, wejxwa Dxusku mjïi sũhnaçxáa weçxana fxi'zewa'ja'.

18 Txãa pa'gatey iiwejçx we'wesa txã'wẽ Dxus dxi'pte ewsa kaseje'çme', naasáa Dxus we'weçxa txã' ewsa' jïnisa yuuçxáa ewsa'.

11

Kristo kaahnisatha'w jïna ïsxiina u'jusa

1 Adxa' i'kwe'sxtxi yu'kxpejxa' sxiigu'ne'thka, nawa txãatxi' mwantaïwe. Makwe ãja'çmeewá'ntka, nawa ãçxwa mwantaïwe.

2 Adxa' i'kwe'sxtxi' Kristo tasxu weh yuhwa txutee jxthãasu'çmeeth. Kna'sawa ma'wẽga teeçxsa yakh yuuçxáa imi'çxa fxi'ze', txã'wẽy i'kwe'sxtxi' Kristo yakh yuuçxáa kaafxi'ze'jya'th neeyũ Dxus dxi'pte.

3 Nawa eçxthẽ'ja' nyafxíiwa ma'wẽga Ewa's ïsxii, txã'wẽy ãçxwa i'kwe'sxtxi's ïsxiijawáana, aç'a' Kristo yakh txakwe ew fxi'zeççxawa txuteewá'kwe sũhçxath ũukhu'.

4 Txã'wẽ yaakxkahníi i'kwe'sxa' wa'lmée jxpa'gana ũsi'kwe adx pta'sxi'th Kristo kaapiya'jni's txã'wēmée fxiy pta'sxsatx. Sa' nyafxíi jxpa'gai'kwe Dxus Espiritu's txã'wēmée fxiysanawa wa'lmée weçxana jxpa'gana ũsi'kwe. Txã'wẽy Dxus yuwe ewte nvxiitwa'jsa's nyafxíi wẽse'ji'kwe txã'wēmée fxiysatewa wa'lu'çmeee'kwe.

5 Txã'wẽ fxiy kaapiya'jsawe'sxa' Jesus jxkaahnisa walasatha'w jï'tx, nawa adxa' txãawe'sxte ãhmeekwesa ne'tka sũju'çmeeth.

6 Adxa' we'weya' yu' ājāçmeene'thka, nawa adx ũuste yu' wala jiith. Txāasa iıçxáath adxa' i'kwe'sxtxi' āate kaajiyu'ju' adx jiyuni's bagaçxtewa.

7 Txā'wē i'kwe'sxtxi kçxhāaçxha'jya' sūhçxa, i'kwe'sx yuutxi's vxyuu pējxmée adx vxyuu yakthu fxi'ze' Dxus yuwe's pta'sxna. Sa' txā'wē yūuçxa', ewmeewá'ntka yuukx.

8 I'kwe'sx yuutxi' vxyuu thāasmée, wejxwa Dxus luuçç vxite ahsuwe'sx adxna peestxi txā'snath i'kwe'sx tasxte kaaselpi'ji'.

9 Sa' i'kwe'sx tasxte ũsçxa', adxa' peejiıçxawa i'kwe'sx yuutxi' maa yuhtxwa thāasmeeth. Adx peejini's Macedoniajū yakthē'jwe'sxtxi pees. Txā'wēth wala jxpa'yakx fxi'zena ũsu' i'kwe'sx yuutxi's maa yuhtxwa thāasmée, sa' i'kwe'sx yuutxi's thāasme'nja bagaçxtewa.

10 Adx ũuste isa yajkxçxa we'weni's Kristo' jiia', aça' Akayasuwe'sxa': Pablo' txā'wē vxyuu thāasku jīya' ājāmeetxna.

11 Kwe'sxtxi ahçeççak Pablo' txā'wē we'we' sūjuwá'kwe. Nawa txā'wē yūumée, i'kwe'sxtxi wala peeygāja'th txā'sa' Dxusa' jiia'.

12 Nawa na'wēth vxyuu thāasu'çmée na' txā'wē yūuna nes yu'nja, adxwa ma'wētkā kīhwa thāasmée Dxus yuwe's pta'sxna ũsu' aça' txā'wēy txāawe'sxwa kīhwa thāasmeetha'w jīya' ājāmeetxna.

13 Txāawe'sxa' Jesus jxkaahnisatha'w jīna iıxiinisa's isasa na'wē we'wena u'jusaçxáata'.

14 Txā'wē yūuni's fxıy yuh yuune'ta sūhna yaakxwa'j jı'phmeetha'w, txāa pa'gatey eçxthē'j

seena'sa yuhçxawa angel ewsa na'wẽ yuuçxak vxya'.

¹⁵ Aça' kxahtx eçxthë'ja's selpisaawa txã'wëy ewmeesaçxawa ewsa na'wẽ yuuçxa vxya'. Nawa txã'wë ewmëe yũuna fxi'zepa'ga vxituwa'ja's ji'phutxna.

Kristo kaahnisa Pablo pxthaa yuuna fxi'zeni

¹⁶ Adxa' na'jĩ'th na': Luukumeeth, nawa txã'wëtewa luukuna sũhna yaakxxa yakh yu' luuku na'wëyçxáawa ki' we'weya'wath: ¿Adxçxáa kĩh yũuçxa iiwejçx yaakxwa'ja's ji'phmëe yuuki'th?

¹⁷ Iiwejçx we'wenisa' Kristo jxkaahnisameeta', naasáa luuku yuusáa we'wenisaçxáata'. Txãa pa'ga adxa' luuku yuusáa we'weniçxá's we'weya'wath.

¹⁸ Naa kiwetewe'sxçxá's jiiçxawa nakwe wala iiwejçx yaaki'tx aça' adxwa iiwejçx yaakxwa'j ji'phne'tka.

¹⁹ I'kwe'sxa' txakwe wala jisatha'w sũju'i'kwe nawa luuku we'wesa yuutxi' jiyumeei'kwe nwëese'je'.

²⁰ Txãasa i'kwe txãawe'sx juuna' kaaselpi'jini's wa'lu'çmëe, ĩsxiiçxa vxyuu kusa'ja'tx, sa' i'kwe'sxtxi iiyamuçxa ahçenatx jxpe'je' uyiina.

²¹ Nawa adxa' txã'wëy juuna' yuuya' ajãmeeth, aça' thaame yuja' nawa pta'sxi'th.

Nawa vxite txã'wë yã'j iiwejçx we'weçte', adxwa txã'wëy luuku we'weni's we'wewa'j ji'pthu.

²² Txãawe'sxa' hebreowe'sxtxna, aça' adxwa txãath. Israelwe'sxtxna, aça' adxwa

txãafiçxáath. Abrahan ji'jtxna, açá' adxwa txajũjxwe'sxthu.

23 Kristo's selpiisaatha'w ji'tx, açá' adxa' txãawe'sxte wejx jxthaakwe selpiisath. Txã'wē iiwejçx we'wenisa' luuku yuusáa we'weniçxá', nawa we'weçthu. Adxa' txãawe'sxte jxthaakwe mj̄isath, txãawe'sxte jxthaakwe p̄kxunisath, karcelte maazkuēe uswa kxuuphnisath, maazkuēe uswa uuwa'theçxáa yã'j fxi'zesath.

24 Adxa's judiuwe'sxa' tahç us kastigãyçxa' treinta y nwewe ãhpkaçtxxi peçxujkwe.

25 Tekh usthu pãpani yuu. Teeçx ente' kwet wãatatahçxa ikhe'dxihtx. Tekh usku adx u'jni barko' ãkh dxiikhē khēe. Vxite ente' teeçx kus pe'te teen utath ãkhsu pehdna u'ju'.

26 Iiméh wala pekũhsath, yu'wala seena'suwa ktejkana, peswée ikh wēeni, adx nwe'sx íiwa ikh wēeni, maawa txã'wēy yūu wēeni. Çxhabsu ma'k yuu, meeçxa' dxi'the ma'k yuu, meeçxa' ãkhte ma'k yuu, nawa txã'wēçxaçxáath ũukh ũukhte fxi'zena ũsu'. Yakhthē'jwe'sxtha'w j̄ina ãsxiisawa ikh wēeni yuuçxáath u'ju'.

27 Mj̄ina nxusteth fxi'ze'. Maazkuēe kuswa dehmeeth u'juwa'j ji'phu', p̄xthaa wēena, yū'wēena, ũ'wa'j uymée maazkuēe uswa u'ju'th, ropa ji'phmée kumana p̄xthaa yuuna.

28 Txã'wē nxuste fxi'zenisaçxáatx ji'phumeeth. Dxus luuçx msuuwe'sxtxiwa jxuka peeygãhna yaakxwa'ja'swa een isath ji'phu.

29 Maawa Dxus yakh çxhãçxhamée fxi'zeçte', adx yuu txã'wē yuuç na'wēth yaaki' txãawe'sxtxi peeygãhna. Maaiitxi's p̄kalte kweete'jeçte',

adx yuu txã'wě pkalte weteec na'wěth yaaki' txãawe'sx pa'gate.

³⁰ Adxa' iiwejçx we'weya'waçxa', wejxwa adx pxthaa yuuna fxi'zeçte Dxus pu'çxku txã'sçxáana yaakxwa'j ji'pthu.

³¹ Bagaçxtewa tuuthe'jni fxi'zewa'jsa kwe'sxtxi jxpe'jsa Jesukristo Tata' jiia' adx íxiiimée isa we'weni's.

³² Vxite ente' adxa's na'wětx yuu: Damasko çxhabte ũste', Aretas jxkaahna ũsni kiwete ne'jwe'sxa' çxhabte u'kani vxitxte adxna tudwa'jsa txajk.

³³ Nawa adxa's kanastate akhçxa wentana muralxakhêtx spajkx. Txã'wě yüuçxath iyu ewmeesa kusejũ.

12

Kristo kaavxya'ja'jni's uyni

¹ Peekiçxáa iiwejçx we'weni yakha' kîh yuhwa ewsa ya'kutxi'ji'çme', aça' wejx yuuwa Kristo kaavxya'ja'jni's uyniçxá's we'weya'wath.

² Katorce anxu yuuça' txãa ensu' teeçx piçthê'j Kristo's nwěese'jsa's tekh cielute kâhpkaçx jxūna u'jnik yuu txãa piçthê'ja's jiith. Txã'sa' petx kakwe ma'k jxūna u'jni yuu, meeçxa' kakwe ji'phmée ma'k jxūna u'jni yuu nawa Dxusçxáa jiina.

³ Ma'wěne' yuu kakwe ji'ph ma'k jxūna u'jni yuu, meeçxa' ji'phmée ma'k jxūna u'jni yuu txãa yu'sa' jiimeeth, Dxusçxáa jiia'.

4 Nawa jxūna u'jni yuh yuuk Dxus ūsnite pa'j. Aça' kxteea' we'weni wēse'kh, kim yuhnawa pta'sxwa'j meea's.

5 Txā'wē yūunisaçxá' iiwejçx yajkxya' ya'ājayujuna. Nawa iiwejçx we'wena ūs wēemeeth, naasáa adx pxthaa yuuna fxi'zeniçxá's yaakxwa'j ji'pthu.

6 Adx iiwejçx we'we wēewaç yu', txā' ĩsxiinisamée yuh yuuna, txāa pa'gatey isasaçxá'sku ya'we'we' naa pa'ga. Nawa txā'wē yu' iiwejçx we'we'çmeeth, kxah maa yuhwa adxa's thaakwe walasana sūhna yajkxmeetxna adx fxi'zeni's uyna wēse'jçxawa.

7 Txā'wē Kristo kaavxya'ja'jnisa' iiméh seena' wala zhiçxkwesa yu'k, aça' txāatx jiyuçxa adxa' iiwejçx yaakxwe'sxte, adx kakwete seena' wala akasa kaapa'ja'jnith yuu, eçxthē'j kaahnisa.

8 Aça' Kristo's tekh uswa pējxthu txāa aka's kaykase'khan.

9 Nawa Kristo' na'wēçxáak pas: Peeygāhçxa adx pi'kxna ūsni wejx thaakwe ewsa', txāa pa'gatey çxhāçxhameesaíçxáa adx pu'çxni's jxpa'gawa'jsata' jī'k. Txāa pa'gath weçxana fxi'ze', aka yu' kasemeetewa, Kristo' adxa's peeygāhçxa pu'çxna nes yuuna sūhna.

10 Txāa pa'ga adxa' wa'lu'çmeeth, çxhāçxhameekuē fxi'zeni, wēesxuni, pejiina fxi'zeni, yahçena fxi'zeni, Kristo's selpiipa'ga thēysa pa'ja'tx txāatx, txāa pa'gatey naa kakwete jwee íçxáa nxuste çxhāçxhameekuē fxi'zeççxa yu', jwee íçxáath Dxus yakh çxhāçxha fxi'ze'.

Dxus yakh fxi'zesa Korintotewe'sx ewmeewáa

fxi'zena ũstxna sũhçxa Pablo kuh yaakxni

11 Luuku na'wẽth peekiçxáa weeçx we'we, nawa i'kwe'sx jiyukahnu txã'wẽ we'wewa'j kaseh. Adxa' Dxus dxi'pte yu' ãhmeekwesaçxawa, na'wẽ Jesus jxkaahnisa walasatha'w jĩ'tx txãawe'sxte yu' ãhmeekwesameeth. Txãa pa'ga i'kwe'sxa' adx ju'gu yuuwa'jsa i'kwe yu'.

12 Txãasath adxa' i'kwe'sx ksxavxyte selpiina ũsçxa', kĩhtewa wantãyna kijkĩhwa kaavxya'ja'th kim yuhwa ewunimeesa iiméh wala zhiçxkwesatx. Txã'wẽ yũunisatx kaajiyu'jsa yu', adxa' ĩsxiiimée Jesus jxkaahnisatewa.

13 Dxus luuçx vxite ahsuwe'sxte thaakwe ãhmeekwesamée i'kwe, nawa adxa' peeygãhçxath i'kwe'sxtxi's pu'çx thãasmée. Txã'wẽ i'kwe'sxtxi kĩhwa thãaspa'gamée ĩmpeltunaĩwe!

14 ãçxha' i'kwe'sx tasxna pa'jya' yuuwa'ja's pheu'jçxa ji'pthu naa yakha' tekh us yujxa' yaakiçthu. Nawa i'kwe'sx yuutxi's thãasme'nja, txãa pa'gatey i'kwe'sx pu'çxwa'jsamée i'kwe, wejxwa i'kwe'sxtxi adx pu'çxwa'jsath ney na'wẽ.

15 Txãa pa'ga adx ji'phuni yu'sa' jxuka ũsu'nja, adx ĩtxĩ fxi'zeniyã'jçxa, i'kwe'sx ũustxi vxitu jxthãasmeeçxa. Txã'wẽth adxa' i'kwe'sxtxi jweeĩçxáa peeygãja', naapkaçxha' i'kwe'sx yu' adxa's jweeĩçxáa i'kwe açe'.

16 I'kwe'sxtxi adx kĩhwa thãassameete jiiçxawa, maaĩ yu' na'wẽ i'kwe we'we': Txã'wẽ ãate yu' kĩhwa thãasmeeçxawa, ma'wẽ

kutxi'jwa'ja'swa jiik yu', txãasaçxáak kîhwa pějxmée jî'i'kwe.

17 Txã'jîkahna', na'wē Tito yakh teeçx yakhthē'j i'kwe'sx tasxna nyafxçxah kaath, çtxagaçx wá'ntka i'kwe'sxtxi' ĩsxiiya' yajkçxa kaah?

18 Tito's i'kwe'sx tasxna nyafxçxah kaja'ççxa', vxite yakhthē'j kaapi'ki'jçxath kaah. çTxãn ente wá' Tito i'kwe'sxtxi ĩsxii? Adxa' Tito yakh teeçxsa na'wēçxah ew yajkxnaçxáa fxi'zesate çjiimeewá'kwe?

19 Kwe'sx dxi'pte ewte neeyũ wēeçxaçxáak txã'jî' sũjuwá'kwe, nawa txã'wēmeeth, wejxwa Dxus dxi'pteth we'we' Kristo jxkaahniçxá's, kxah i'kwe'sxa' Dxus yakh jweeiçxáa çxhãçxha fxi'zewa'ja's uyuune'kwe, adx yakhthē'jwe'sx yaakxnisa.

20 Txã'wēme', i'kwe'sx tasxte pa'jçxa', adx jxkaahnime's wáa uyu'nja. Sa' peeygãhna pa'japkaçxte, juuna' yuuwa'j wáa kasejena sũhte ũukh yuja'. Txã'wē adx pa'ja'çte', i'kwe'sxa' puutx puina, vxitee ji'phunitx açeyajkxna, ũusaçxana, puutx txuteena, yuwe susna, e'sgaçxáa açewe'wena, iiwejçx yajkxna, ewmée wáa fxi'zena ũs yuune'kwe sũhtek ũukh yuh yu'.

21 Sa' i'kwe'sx tasxna yujxa'wath txãa ente' i'kwe'sx pa'gate adxa' Dxus dxi'pte thaamewa'j ji'phuwá'nja sũhçxa ũukhu'th. Txã'wē i'kwe'sx txakwe txaçxtewa pkal kazxsate íiçxáa fxi'zena ũste uyna pa'jçxa', wala nxusna ũ'newa'j ji'phu'nja sũhçxath txã'wē ũukh yaaki'.

13

Yu'kxpehna yuwe weçxaa kaahni

¹ Naa yakha' tekx us i'kwe'sx tasxna pa'jya' yuuwa'ja's yaakiçthu. Kxtee pa'jçxa', kîh yuwe's pheu'ju'ççxawa, jiisa e'z meeçxawa tekx txahçxa yuuwesa's kastigâywa'j yuuna.

² I'kwe'sx yakh kxtee nyafxii üsçxa', jxpa'yakx fxi'zekahn dxiiikhëy we'weth pkalte fxi'zesatx maatxwa na'jîna: I'kwe'sx tasxte ki'kin pa'jçxa', peltunaîme'nja jîni's açxha' ki' kaayaki'jiçthu nee jxu'the üsí.

³ I'kwe'sxa' adxa's jiyu wëena üsi'kwe Kristo kaahnisa dxihetewa, txã'sa' adx pa'the jiyune'kwe. I'kwe'sx ähmée yüusatxi's Kristo' juuna'meeuë jxkaja'çme', txãasa txajx juuna' jxkaahni's i'kwe'sx ksxavxyte kaavxya'ja'jya' üsa'.

⁴ Txã' naa kiwete çxhãçxhameekuë fxi'zesa na'wë yuh kluuste fxuçni uuk, nawa itxî yuuk seena' çxhãçxha yuuwa'ja's Dxus üste. Adxwa txãa na'wëy naa kiwete çxhãçxhameekuë fxi'zeni's ji'phuçxawa, txãa yakh fxi'zeçxa', Dxus kçxhãaçxha'jnith fxi'ze' i'kwe'sxtxi yu'kxpehwa'jsa.

⁵ Txãa pa'ga ¿ma'wë üskxtha'w? sühna meswe, aan Dxus yakh fxi'zena üsne'kwe. İxiisamée Dxus luuçx dxihçxa', ¿Jesukristo's üste ji'phkwe'?

⁶ Jesukristo's üste ji'phdxihçxa', adxa's ew jiyune'kwe, Dxus luuçxthu jîna isath we'we' naa pa'ga.

⁷ Txãasath i'kwe'sx pa'gate Dxus yakh pu-
utx we'we', kîhwa ewmée yûuna fxi'zekahmen.
Adxa' îsxiçxa txã'jî'çmeeth, naasáa i'kwe'sx
ewçxáa fxi'ze jxthâasçxath txã'jî'. Adxa' îsxiisa
na'wê wá'ntka, nawa txãa yu' kîh yuumeena.

⁸ Txãa pa'gatey isasa's kxtey nwêese'jwa'jçxáa
ji'pthu.

⁹ Dxus yakh i'kwe'sx çxhãçxha fxi'zeçte', adxa'
weçxa'th. Adx yu' çxhãçxhameekuêçxawa,
Dxus yakh puutx we'wena nes yu'nja, i'kwe'sxa'
Dxus yakh çxhãçxha fxi'zeyá' âjâkahn.

¹⁰ I'kwe'sx tasxna yuhmey, naa karta's fxi'jçxa
yaçte kajaçthu, kxah adx pa'jçxa', i'kwe'sxtxi
juuna' yuuwa'j ji'phume'nja. Txã'wê juuna'
yûuwa'ja's Kristok adxa's neewe'we, i'kwe'sxa'
Dxus yakh txutemée jweeíçxáa çxhãçxha
fxi'zewa'ja's ji'phukah. I'kwe'sxtxi wejx yuuwa
kçxhãaçxha'jnath txã'wê yû'.

¹¹ Açxha' yakthê'jwe'sxtxi neewe'we'th
ewçxáa fxi'zekahn. Kîhtewa jxpubamée
fxi'zewa'jçxá's mpaakwewe. Kvxiisxa'jni
myûuwe. Kxteeçxah zhiçxkwe puiimée
mfxi'zewe. Aça' ew kaafxi'ze'jsa Dxusa' i'kwe'sx
yakh nes yuuna peeygâhna.

¹² Ũsuh jxuka yajkxçxa puutx teeçxa
na'wêçxah yuwe mweeçxawe.

¹³ Dxusa's jiisa yakthê'jwe'sx jxukaysatx
yuwe weçxaakaja'.

¹⁴ Dxus yakhçxáa mfxi'zewe. Jesukristo
pu'çxhina, Dxus Espiritu yakh txutemée
fxi'zekahn.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd